



наведи телефон

Лүимә СЭрипос

23.03.2023
№ 6 (1288)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru



Л. Теткина вӑрум хури

**Ты
номерт
ловиньтэн:**

Юнтум
маснутаныл тах
суссылтыяныл

▶ 2

Пумыщ хаництап
ӧлыс

▶ 5

Нӓврамыт Нӓрыт
ляпат ӧлнӓ пӓвылн
ялсыт

▶ 7

Мӧлты тӧл сӓв
вӧр нӓйн ӓсвес

▶ 10-11

Тав ӧкве Анна
Конькова ӧлыс

▶ 14-15

Сӓв потыр ӧщнӓ
ӓква

▶ 16

Тӓк пӓвылт ӧлнӓ мӓнӓщи ӓква Анна Константиновна Самбиндалова мӧт мӓщтыр нӓквет ӓт Хӓльӧсн щаквщункве ӓхталас. Тот вӓрыглым хаництап ханты лӓтӓыл «Хошум хот» намаим ӧлыс. Ты вӓрмаль урыл лӓххал китыт лӧпсыт ловиньтэн.

Юнтум маснуктаныйл тах суссылтыяныл

Хальүс район янытыл өлнэ мәщтыр нэквет 2015 тал пәсныл кәсың порат акван-атхатыгләгыт ос тәнки халанылт пәс щырыл щаквщүңкве ханищтахтәгыт. Ханищтап ханты ләтңыл «Хошум хот» намаим өлы. Ты тал мәхум мәньполь этпос 17-19 хөталытт Хальүсн вөвыглавәсыт, тәнт тән щүлкиныт ос пәссат сагсыт.

Хальүс районт өлнэ нэ хөтпат мәньщи, ханты маснук эрнэ щырыл, пәс хольт вос юнтәгыт ос мәньлат хөтпат аквта щырыл мәщтырлаңкве вос ханищтыяныл, таимәгысыл ты рүпата ань вәрыглаве.

Өвыл хөталәт сossa хөтпат әт пашалахтуңкве Хальүс район миркол күщай хум Павел Артеев әхталас. Тав ләвыс:

– Ты тәя молях толүңкве патыс, яласан ләңхыт тәра ләүлиг әмтсыт, таимәгыс сәв пәвлытныл мәхум ат әхтысыт. Матәмас Тәк, Ягрим ос Нәрихумит пәвылныл мәщтыр нэквет тыг әхтуңкве вәрмысыт.

Нән сәв тал сыс тох акван-атхатыгләлэгын, мәщтырлаңкве әмашакв ань хәсэгын. Тамле ханищтапытн нәврамыт өс вөвыглән, пәс щырыл щаквщүңкве тәнаныл ханищтән.

Ты вәрмал палт пүңкөтөт ханты нэ **Любовь Кашлатова** өлы. Тав «Югра лылыеп» организация сәв тал рүпиты ос сossa мәхум өлупсаныл нөх-вөрмалтым яныг рүпата вәри. Ты ханищтап урыл тав таи потыртас:

– Мән Әс мәньщит ос хантыт өщнэ сагим вәит, пәссат тыт сагсүв. Мәньщи,

ханты щырыл щаквщүңкве кәсың тал атхатыгләлэв. Акв тал Ягримн ялсүв, мөт тәлт Тәк пәвылн нәт вөвыгласанүв, юиөвыл хүрум тал Хальүс сossa мәхум өдделт тамле ханищтап вәрыглэв. Ты порат сыс пүңкөт, суп, нуйсахи, сакың нәрат юнтуңкве, турлөпсыт, пальсакыт хартуңкве, әги саг сагуңкве ханищтахтасүв. Ань мәньщи ос ханты нәт өщнэ маснуктаныйл мән пуссын юнтсанүв. Ты маснуктанув сәвсыр ялпың хөталыт суссылтаңкве тах патыянув. Хальүс районт кәсың туи «Мәньхәп» нампакасыл вәрыглаве, тув сәв мир әхталы. Мән миркол күщитн пищма хансуңкве ань тах патәв. Юнтум маснуктанув ты ялпың хөталыт вос суссылтыяныл. Мөтнэкветты нәтнэ маснукт кәсаләгыт, пәс щырыл щаквщүңкве эрың өс тахмагәгыт.

Мәщтырлан вәрмалюв рүпитан мәгсыл Хальүс район миркол пәлыл олныл тәставәв, ты олнытыл мән сак, төр, нуй ос мөт эрнэ пормасыл әвтавәв. Ты элы-пәлт тыг әхталан нэквет яласан ләңханыйл, тәнэ ос өлнэ кол мәгыс олныл ойтвәсыт. Ань мәнь пәвылкет өлнэ мәхум тәнки тыг әхталәгыт, ты вәрмал мәгсыл олныл



Район күщай П.В. Артеев потырты



Мәщтырлам экват хүнтләгыт

воссыг ат мивәв. Юиөвыл тәлыт Хальүс ләпат мәнь пәвылкет өлнэ хөтпат тыг туп вөвыглэв.

Хальүс районт өлнэ мәньщи ос ханты мәхум маснуктаныйл әти акв хурипат. Мәньщит мөт щырыл супаныл йиньяныл ос юнтыяныл. Сакың нәрат Әс мәньщиянув тән тамле ләгыл маснукт өщсыт, сагим вәит тәнки мәгсыланыл сагсыт. Тәгт ос Сакв мәньщит совя вәй өщсыт ос сагим вәй ат масыгласыт.

Любовь Васильевна ләвыс, ань Саранпәвыл, Кульпас, Хүлюмсүнт ос

Нәхщамвөл пәвлытыт өлнэ мәньщит ты ханищтапын сака ат әхталәгыт. Ос таи әмас, тән тәнки өлнэ мәнаныл тамле ханищтап ань өс вәтихал вәрыгләгыт ос тәнки щырыл юнсхатәгыт.

Хальүст өлум ханищтапын 50 арыгкем нәт әхталасыт. Тән пуссын янытлан нәпакыл майвәсыт. Мөтыт тал мәщтыр мәхум өс тох акван-атхатыгләгыт, тәнт хум суп юнтуңкве вуйхатәгыт.

Людмила ТЕТКИНА

Писалил пәтлуптым ёсал хайтсыт

Ювле хультум сәтыт Ханты-Мансийский районт «Остяко-Вогульск» нампә ўщлахтын мāt касыл б̄лыс. Ты касыл Ханты-Мансийский район 100 тәлэ төвлын касыл вәрыглавес.



Хум ёсал хайты

Районт сәвсыр пәвлытт блнэ в̄раян хумыт тот акван-атхатыгласыт. Ты касыл титыт щёс ты б̄лыс. Тув Нефтеюганский районныл ос Шапша, Ярки, Ягурьях ос мот мән пәвлың маныл м̄хум ёхталасыт.

Касыл б̄вылтан элы-пәлт хоталъят порат тув ёхтум м̄хум акван-атвёсыт, нэпак-лөмт хар-туңкв ләввёсыт, халанылт хотьютаныл хайтуңкв хунь б̄вылтахты. Тувыл м̄хум мощ пурлахтасыт, кұшайтн янытлабёсыт, сәв ёмас ләтңыл ләввёсыт.

Та юи-пәлт каснэ вәр-маляныл та б̄вылтавес. Каснэ лёңханыл хурум вёрыста палытэ б̄лыс. Овлэт тән ёсал нас

хайтсыт, тувыл пәтлуптан мән ёхтынэныл юи-пәлт тәнанылн тит щёс пөсн пәтамтаңкв эрыс. Ос мощ хайтэгыт, аращ пәлтнэ мән ёхтыгпёгыт, аращ пәлтэгыт. Най ёмашакв хунь нөх-пёлаи, тонт уц тән элалы та нуйхатэгыт.

Това хумыт танти ёсаныл ёт-тотыгласаныл, ёмашакв щёпитамааныл. Паттаныл кот-лөмтыл рәт-маныл, тән сыпн нөңхаль молях ты хайтсыт. Ос хотьют нас ёсал хайтыс, тән ләвсыт – тәнанылн сака тәрвитың б̄лыс. Та хотал ащирма вәрыс, туйт осэ тув-пөлясавес, сака вольк б̄лыс.

Хумыт хайтманыл юи-пәлт пуссын акван-атвёсыт. Тәнаныл Ханты-



К.Р. Минулин ос М.К. Волдина

Мансийский район кұшай Кирилл Равильевич Минулин янытласанэ ос кәсың хөтпа янытлан нэпакыл мистэ. Нөх-патум м̄хум халт хурум команда пёриявес ос янытлавес.

– **б̄выл мёста** Нефтеюганский районныл ёхталам хумыт (Ю. Шишкин, Н.Пустовалов, М. Жердев) висыт;

– **титыт мёстат** Шапша пәвыл хумыт (С. Спиридонов, И. Ващенко, А. Решиков) майвёсыт;

– **хурмит мёстан** Ягурьях пәвылт блнэ хумыт (И.Слинкин, В. Простокишин, В.Слинкин) патсыт.

Ты касыл яңкылмаң мāt вәрыглавес, тот хурум ёрнкол тўшталавес. Акватэ артист м̄хум м̄гыс б̄лыс, мотыт каснэ хумыт м̄гыс. Хурмит ёрнколт муй м̄хум исыл-тахтуңкв вёрмысыт, тән тот исум щәил, хул исмитыл, сәвсыр хулыл титтувёсыт.

Шапша пәвылныл «Мощ хот», мәнъщи ләтңыл те ләвуңкв – «Мойт кол», нампә ййквнэ ос эргын колн ялантан агит-пыгыт ёхталасыт. Тән кұшаяныл

Лидия Александровна Алясова б̄лы. Тув ялантан хурум пыгрищит, Женя Важенин, Кирилл Вьюткин ос акв пыгрищ, наме ат вәглүв, хум ййквыт, агит ос «Куринька» ййквсыт.

Мария Кузьминична Волдина ләтың ләвуңкв ос в̄выглавес, тав м̄хум янытласанэ. Ләвыс, в̄раян хөтпат пуссын в̄р ургалым б̄лэгыт, тән арген сәв в̄руй нәмхуньт кәтн ат паттэгыт, туп эрнэ сәвит. Ос ворт яласанэ-ныл сыс в̄р уральтыяныл. Тувыл эква ханты эрге эргыстэ ос м̄хум в̄всанэ, мувлахи ёңхатах-тыглым «света и добра» ләтңыг сәт щёс ләвуңкв. Та юи-пәлт м̄хум ләккв та мингаласыт.

«Остяко-Вогульск» нампә ўщлахтын м̄ мус нёлсәт нупыл нила вёрыста Ханты-Мансийск ўсныл м̄шинал минуңкв эри. Тот тит блнэ колыг унттымаг. Хотьют кәсащи, олн мус тув блуңкв мощ-щан ёхталы. «Охотничий биатлон» нампә касыл тоттитыт щёс вәрыглавес. Мотыт тәл в̄раян м̄хум каснэ м̄гыс тув б̄с тах атыглавет.

**Валентина
ХОЗУМОВА**

Мәньщи латың ищхыпың ут хосыт ханищтән

Хальүс районт тэлы лёңхыл яласан сус Денис Вынгилев «Төрүм Ащ латың» проектэ ёт мәнь павлың школатн бс ялыс. «Онлайн-переводчик с озвучкой мансийского языка» ищхыпың утэ урыл ос хумус тав ётэ рүпитаңкве эри, тав мәхумн тот потыртас.

Тав Саранпавыл ос Кульпас школагн, Лопмус ос Кимкьясуй мәнь няврамыт ханищтахтын школагн щалтсас. Мәньщи латың ханищтан няврамыт ос тән ётаныл рүпитан хөтпат ёт вайхатас. Ётыл Санкт-Петербургуһн минас ос тот А.И. Герцен нампа университетт ханищтахтын агит-пыгыт ёт хөнтхатыглас.

Тув ялум тэланэ урыл Денис Вынгилев китыгласлум, тувыл маныр вәруңкве элаль номсы, та урыл тав тох потыртас:

– Ам ань вәрнэ тэланум пуссын ёмщакв элаль минэгыт. 2018 талныл вәрум ищхыпың утыт мәньщи латың толмашлан лопсус мәхумн суссылтылум. Ты рүпатав хосыт ань 5 сөтыра мәньщи латңыт рущ латңыг толмашлым кәсалавет, тувыл хум хөтпа манос нэ хөтпа турсуил хунтамлаңкве рөвөгыт. Латңыт пуссын Е.И. Ромбандеева хансум словарь-нэпакныл ловиньтавёсыт.

Ань компьютерт манос щёпт бщнэ телефоньтт мән щёпитан веб-приложенияв хумус рүпиты, тамле тэлат мәхманувн суссылтэгум.

Өвлэт ты программав кәсың хөтпа такви щёпт бщнэ телефонән вәритэ

ос тувле нупыл сунсым рүпиты. Няврамыт молях ханищтахтэгыт, матыр латың кинсуңкве лавёгын, тән тув хансыяныл ос тәра хөнтыяныл.

Вәим, тән щёпт бщнэ телефонын ханьщувлым бльэгыт. Яныг хөтпат янас ханищтаңкве эрөгыт, төванакт тулёвлыл мөт клавиша понигтэгыт ос хот-тыпылтахтэгыт. Тувыл алаты хот-пөйтэгыт, элаль кискхатуңкве пилэгыт.

Мән ты веб-приложение вәрнэв порат кискхатнэ тэлат күпнитыг кос ос кәсың хөтпан торгамтанэг щёпитасанүв. Тувыл тананыл ханищтан мәгыс кина-охса пөслыслүв.

Ты рүпатав вәрнэв юипәлт мән ань мәньщи предложеният акванатыянув ос ищхыпың утувн хансыянув ос хунтлын мәгыс лавиянув. Төнт элумхоблас сәвнув мәньщи латңыт хунтамлы, торгамтыянэ ос тананыл номуңкве патыянэ.

Рүпатав элаль тотнэ мәгыс ос эрнэ щирыл вәруңкве, вәим, сәв олн эрыс. Овлэт ты рүпатав мән мәнки сэлнэ олнытыл вәруңкве бвылтаслүв, ётыл ущ олн-нётмил хөнтсүв. Ос проектыт анузн нётнэ хөтпат олныл ойтсанум. Ам номсытепт, ты проект хосыт мөт соссa мирыт халт мәньщи латың



Кульпас няврамыт



Лопмус няврамыт

ханищтан накыт ань щар бвылт бльэгыт.

Денис сәв мәхум ёт хөнтхатыгламе юипәлт ань ты тэлатэ мәгыс эсгувес. Мәхум лавёгыт, ань ищхыпың утыт щаньлэтың ханищтан лөпс тананыл сака эри. Тән ань ты лөпс вәтихал сунсыглыяныл ос тох латың ханищтэгыт.

Ксения Ануфриева, А. И. Герцен нампа университетт ханищтахтын аги, тох хансыс: «Ищхыпың ут хосыт мәньщи латың ханищтан нак щар ёмас тэлаг олы. Ам школат ханищтахтамум порат пёс словарь-нэпакылы майлувёсум, нэпакылы пуссын бс ат төвлавёв. Тувыл агирищит-пыгрищит хоса кискхатэгыт. Ань сунсән, такем ёмас, кәсың хөтпа такви щёпт бщнэ

телефонэт мәньщи латың толмашлан лөпс бньщи. Тав щирётыл күпнитыг рүпитаңкве рөви. Тот сәв латңыт хунтлэв, төват хурил пөслувёсыт. Ань ты мәхум рүпатаныл ос элаль вос тотнуваныл».

Тувыл та университетт уральский латңыт ханищтан колт күщаиг бльнэ нэ **Марина Дмитриевна Люблинская** тамле латың хансыс: «Лингвистика ханищтан тэлатыт «Төрүм Ащ латың» проект сака пумщалавес, тав мәньщи латың вәнэ мәгыс ос ёмщакв потыртан щирыл мұсхалыг вәрвес. Мән ань мөт соссa мирыт акв тамле толмашлан ут щёпитан мәгыс аквьёт рүпитаңкве потыртахтасүв».

Тамара МЕРОВА

Пумыщ ханищтан олыс



«Нёрт вотасың пора» ханищтап олыс

Маньполь этпос хурмит ос нилыт хоталагёт Саранпавылт «На горных ветрах времени» нампа ханищтап олыс. Тамле нак тот олнэ музейт рупитан хотпатн хотыт щёс вэрыгавес.

Мобалнув ам Любовь Павловна Стаканова ёт потыртасум. Тав а́нумн лавыс:

– Ман ты ханищтап музеюв ос «Исторический клубн» ялантан няврамыт ёт 2012 талныл вэрункве патыслув. Павлувт савсыр пёс вэрмалит о́вылтыт матыр тэрапаттуңкве эри, ты рупата акваг ат холы тах.

Саранпавыл 2022 талт 180 талэ тóвлыс. Ляпат мот мань павылквет о́с олэгыт. Пуссын тан уранылт няврамыт ос яныг хотпат матыр-а́ти тэрапаттэгыт, тувыл потрыт хансэгыт. Касың хотпа такви самын патум мэтэ эруптым вос о́ньцитэ, ёмас тэланэ вос вэганэ ос пёс йис накыт ургалым элаль вос тотыянэ.

О́выл ханищтап вэрмув порат ма́хумн такем пумыщ о́лыс, таимэгыс ман таве элаль вэрункве номылматыслув. Лопмус ос Кульпас павлың няврамыт пумшалаңкве о́с патсанув. Ань кит тал сыс

акв щёс ханищтап вэрыглэв, тувыл ма́хманув ёт хурум павыл халт акван-атхатыглэв. 2025 талт сатыт ханищтапувт ман Хальу́ст акван-атхатуңкве потыртахтасув.

Касың павылт яныг хотпат ман хольтув о́с пумшалахтуңкве патсыт. Тан ань хотты рутаныл манос матыр-а́ти тэлат о́вылтыт танки маныр номэгыт ос вэгыт, таияныл пуссын нэпакн хансыяныл ос тувыл ханищтапув вэрнэв порат ловиньтыяныл.

Ман тананыл краеведыг лавиянув, тувыл тананыл олупса урыл акваг китыглаңкве вэрмиянув, тонт о́с савсыр пумыщ тэлат хунтамлэв. Акв элумхóлас матыр ат ке вэг, мот хотпат номылматэгыт, тох потрув элаль мины ос пёс накыт о́снпатэгыт.

Ань ты ханищтапувн лов хотпат танки хансум потраныл тотсыт. Тох Мария Алексеевна Калугина сав вэг, манавн

аквписыг нёты, Саранпавылт олнэ ма́хум эруптым о́ньциянэ. Ты талт тав саран ма́хум щай айнэ вэрмаяныл урыл потыр щёпитас. Мария Павловна Терентьева «Оленёнок» нампа мань няврамыт у́рнэ кол о́вылтыт потыртас.

Ты тал ханищтапув вэрнэв ма́гыс сака сав ма́хум лэтың кётсыт. Ат потыр Саранпавыл школат ханищтахтын агит-пыгыт хассыт, хурум потыр ДЮЦ «Поиск» нампа колн ялантан ос сат потыр «Исторический клубн» ялантан няврамыт хассыт ос ловиньтасыт.

Тан павлувт олнэ вэрмалит ман сэлың ма́хманув о́вылтыт, пўльницат рупитан лёккарыт урыл потыртасыт. Тувыл кёр овумлаптын пёс накыт, нэ хотпа тучаң хурыгсов юнтнэ о́вылтыт ос Андрей Яковлевич Хатанев ёсал хайтнэ нак о́вылтыт потрыт хунтлысув.

Кульпас школат ханищтахтын няврамыт нила потыр ловиньтасыт. Тан хонтлам порат павлыт рупитам ма́хманыл урыл, «Кульпас кол» ос Потрасуй павылт олнэ рут колтагыл о́вылтыт потыртасыт.

Ма́хум хансум потраныл ман манки о́шнэ ищхыпың лопсувн вэриянув тах. Та щирыл мот хотпат ты урыл о́с вэнкве патэгыт. Тамле ханищтапув ман научно-практическииг о́лы. Наукат ханищтан вэрмалит Светлана Алексеевна Попован аквагуральтавет.

Ты талт ман ётув Ольга Михайловна Шиповалова, Хальу́с архив колт пункютнэ нэ, рупитас. Тав ма́хманув хумус архив тэлат ёт рупитаңкве вэрмэгыт – ма́щтыр щёс вэрыглас. Тóванакт элумхóласн э́рнэ ляххалыт молях хонтуңкве эри, ос хот кисхатуңкве, тав ат вэгтэ. Ань ты тэлат мўсхалыг суссылтавёсыт, пуссын ёмщакв ханищтавёсыт.

Любовь Павловна элаль тох лавыс, ты ханищтапаныл тан танки ёрыл вэрияныл. Мот павылн ялнэныл ма́гсыл няврамыт щань-а́щаныл лёнх олныл мивет ос олнэ кол ма́гыс олн ойтэгыт. Тóва предприниматель-хотпат олн-нётмил мыгыт ке, тан сака ёмас нётэгыт. Ты талт «Северянка» нампа тэнэ колт рупитан нэ Л.А. Филиппован ос ООО «Сосьва» нампа колт кўщай хум А. Г. Полуяновн пумаципа лэтың лавёгыт.

Кульпасныл муй ма́хум алпыл Саранпавылн ёхтысыт, тэра тыттувёсыт ос тувыл ханищтап та о́вылтавес. Мотыт хоталт элаль рупитасыт ос хоталъят юи-палт муй хотпат ювле та миныгласыт.

Няврамыт ань сака пумшалахтэгыт, касың йильпи вэрмалин хотцагтым олэгыт. Таимэгыс тамле ханищтапыт тах элаль вэравет.

Тамара МЕРОВА

Хоса лёх яласаңкв Эри



Наталья ос Валентин Тэвлиныг

Округув янытыл тэлы порат сáлың мáхум янытлавет, тáн халанылт касэгыт, тáн кастыланыл ос мот мир мágсыл ты яныг ялпың хоталыг олы. Тув яныг кúщаит, артист хотпат ёхталэгыт, товат сáлы овыл щёс кáсалыныл, тот та пумщалахтэгыт.

Ханты-Мансийск үсн кáсың порат мáньполь этпост овыл ущлахтын хоталт ты каснэ вáрмалын вáрыглаве. Та порат ос «Дух огня» тина суссылтан фестиваль овылтаве, Москваныл ос мот хон мáныл артистыт, режиссёрыт ёхтэгыт, тáн мán мáв ос сосса мир овыл щёс кáсалыяныл.

Сáлың мáхум сунын тáлым нуйхатэгыт, хумыт ёсал ман товтыл масхатим сáлыяныл юи-пáлт тотавет ос мот сáвсыр

щирыл касэгыт. Экват ёсал хáйтэгыт, тувыл тáн сунанылн нáйив тáлттэгыт ос сáлыяныл вáнттым хáйтэгыт, хотьютаныл моляхнувты рупата вáри, тав нóх та паты. Каснэ мáхум нупыл сунсуңкве сака пумщиг олы.

Ань тýяг касманыл урыл мán хансыгласүв, элаль ос мот номинациятыт касум ос нóх-патум хотпат наманыл хансэв: – Сáлың сунаныл ос сáлы квáлганыл ёмщакве, нётнэг вáрманыл мágсыл ты мáхум нóх-патсыт: овыл местат **Иван Попов**, титыт местат **Артём Тарлин**, хурмит местат **Вероника Кантерова**.

Сáв тáл сáлыт янмалтан мáт рупитан ос та кастыл вáрнэ рупатаныл мágсылты мáхум янытлан нэпакыл майвёсыт: **Иван Попов**, **Юрий Тарлин**, **Алексей Тарлин**, **Тамара Вынгилева**, **Елена Рокина**, **Данил Покачев** ос **Алексей Русскин**.

Мáньщи эргыт эргуңкве, сáңквылтаңкве ос ййквуңкве «Сáлы лёңх» театр нýврамыт Саранпáвылныл ёхталасыт. Тáн сака ёмщакв ханищтавет. Мáкыг мáньщи тáныл сáңквылтаңкве тáн хá-

сэгыт, мáньщи лáтңыл эргуңкве ханищтавет. Саранпáвыл артистанув округ губернаторн янытлан нэпакыл майвёсыт ос пумащипа лáтңыл лáввёсыт. Тувыл «Югра лылыёп» общественный организация ос тамле янытлан нэпакыл майвёс.

Валентин ос Наталья Тэвлиныг Сургутский районт тэнти мáтэнт сáлыянэн онычим олёг. Тэн кáсың тýя каснэ мán ёхталэг, ам нэг-хумыг яласан лёңхэн урыл титыгласагум, **Валентин** тащир лáвыс:

– Ам тыг нила сáлы тотыгласум, аквам йирхатнэ канын тотыслум, тот юныгтаслүв. Хурум сáлыянумтыл кассум. Тáнаныл мán мáшинал тыг мус тотыянүв, сака хоса лёх тыг йиңкве Эри.

Ань тах ювле мáшинан тáлттыянүв, Когалым үснныл ос элаль тотавёв, тот сурум лёх ойгпи, тувыл элаль ам сáлыянум тэриянум ос оlnэ мáм мус налыман вёрыста та минэгум. Эквам ос тувыл снегоходыл мины, мэн тох та юв ёхтахтымэн.

Яласаңкве тэрвитуң кос, сáлыт машина тй-вырт кáтаныл-лáгланыл аквам-нэгыянүв, хуим та тотавет. Тох тáн кáтаныл-лáгланыл кáртэгыт ос хунь хот-тáртыянүв ушта тáнанылн ёмасыг ёмты. Юв мус молямтахтым та хáйтэгыт.

Ёхталан мáхум тáл сýс сáлыяныл ёмщакв вос ханищтыяныл ос нóх-патуңкве вос вёрмёгыт.



Артём Тарлин тыныщаң пáхвты

Галина КОНДИНА

Няврамыт Нёрыт ляпат өлнэ павылн ялсыт



Манья-сүнтын ялум махум

Хулюмсүнт павылт 11 классыт ханищтахтын агит ос пыгыт школат рүпитан нила хөтпатн ос щаньянылн-ащанылн Манья-сүнт павыл мус тотыглавёсыт. Тән маньполь этпос сатыт хөталэт Нёрыт ляпат үнлын павлытн ялсыт. Хаңласы, Няхщамвөль ос Яныгпавыл тара миннэ лёңханыл өлыс.

Хаңласы павыл Хулюмсүнт ляпат өлыс, махум тув ат хөигласыт. Маньшит хумус тот өлсыт ос сав мөт пумаш вәрмалит урыл, ты павыл тара миннэныл порат няврамыт потыртавёсыт.

Пёс порат Хаңласы павыл тара Ивдель мус лёңх өлыс. Тара миннэ махум тув үщлахтуңкве хөигласыт. Ос 1902 талт Л.Д Троцкий ты лёңх хосыт ссылка маңыл ояс.

Няврамыт Няхщамвөльн ёхтуманыл порат павыл суссыт. Тувыл школат урокыл вәрыглавёсыт. Хулюмсүнт школат рүпитан нэ Т. А. Головина Тагт я урыл латың лавыс, витэ сыстам манос пәңкың, хумус ищхйпың утыт щирыл ханищтаңкве таве рөви ос сав мөт пумаш тэлат урыл тав потыртас.

Няхщамвөль школат

рүпитан нэ В.В. Ануфриева ос «Выгыр нэпакн» хансым воруит, төвлың үит, лүпат, ләхсит урыл урок вәрыглас. Хулюмсүнт школат рүпитан маньлат нэ В.Н. Кивелева агит, пыгыт исвещат вәруңкве ханищтасанэ. Няврамыт



Манья-сүнтыт өлнэ бйкаг эт

вәрум тамле утыт ань Югорск үсн кётавет. Та үсныл хөнтлан хөтпат пәлт элаль тах тотавет. Тамле исвещат тәнанылн ань сака эрөгыт.

Ты юи-пәлт няврамыт школат ёмашакв тэпьяласыт ос элаль Манья-сүнт павыл нупыл минмыгтасыт. Тув миным Яныгпавылн хөигласыт. Пёс порат тот ос сав мир өлыс, ётыл махум Няхщамвөльн манос мөт мән өлуңкве пуссын вәнтласыт.

Ань Яныгпавылт туп акв-кит хөтпа өлы. Махум тот мощ үщлахтасыт, павыл сунсыгласыт ос элаль Манья-сүнт павыл нупыл минасыт. Ты павыл Нёрыт ляпат үнлы. Нёранув тувыл ёмашакв нәңкөгыт.

Та мāt Тагт я овтуңкве өвылтахты. Тув ёхтынэныл порат тот өлнэ хум хөтпат пуссын кон-квалсыт, мүй махумн тән сака щәгтсыт. Аньтотнила элумхөлас өлы. Ты элы-пәлт Манья-сүнт өс яныг павлыг өлыс, тот павылт школа, пүльница, ләпка, няврам үргалан кол рүпитасыт.

Савсыр тының ахвтас киснэ хөтпат рүпитаңкве хунь пөйтсыт, павлың мир өс мөт мән вәнтлуңкве та патсыт.

Ань тот өлнэ хөтпат вөраим, хүл алыщлым ос үйхул өньщим өлэгыт. Няврамыт павыл хосыт ёмыгтасыт, сунсыглахтасыт ос пөслахтасыт. Тувыл ос та мāt вит ёт амартасыт, ювле ёхтын порат школат ёмашакве өс тах ханищтыяныл.

Мүй махум павлың хөтпат ёт мощ потрамамыт ос ювле Няхщамвөль нупыл та минмыгтасыт.

Аквта хөталэт 11 классыт ханищтахтын агит, пыгыт Хулюмсүнт павыл школат рүпитан хум С.В. Белоногов «Модель ШКИБ» нампә ёнгилыл Няхщамвөль школат вәрыгласанэ. Та юи-пәлт мүйлын махум ювле өлнэ павылн щөпитахтуңкве та патсыт.

Няврамытын ты экспедициян ялуңкве сака мустыс. Хулюмсүнт миркол нупыл хоты павлыт хансым өлэгыт, махум хумус тот өлэгыт, тән ань ёмашакв вәгыт.

Манья-сүнт павылн махумн ялуңкве Хулюмсүнт миркол кұщай нэ Т.К. Волкова, Няхщамвөль школа кұщай нэ А.А. Борисова ос А.Н. Ануфриева, тав вәңын нэтэ, нётсыт. Ты кастыл махум тәнаныл яныг пумашипа латың кётэгыт.

Татьяна Головина
кётум потыр
маньши ләтңыл
Людмила ТЕТКИНА
хансыстэ

Т.А. Головина кётум хурииг

Саранпавылн ёхталам щёмьят ёмщакв мүйлысыт

Касыңьёмт сәлыл каснэ вәрмаль Саранпавылт хоса ўрилўв, тав ос акв хотал сьс тара та мины. Тув сав маныл махум мүйлуңкве ёхталэгыт, тувыл та каснэ вәрмалит ёмас номтыл оньцияныл. Ань товат ёт вайхатсум ос ты овылтыт китыгласанум.

Кит щёмьят, Соколов нэг-хумыг Тобольск ўсныл ос мот нэг-хумыг Наталья ос Дмитрий Тишиныг Челябинский областьныл ёхталасыг.

Тишиныг лавьсыг:

– Мән Снежинск ўсныл ань тыг ёхтысўв, Евгений пыгмён Мурманский область Полярный ўсныл тыг вовысламён. Саранпавылн мән 2020 тал

пасныл ёхталаңкве тахсўв кос, тахольт 2023 талт номтув тэлаг та ёмтыс. Таимāгыс хот-щāгтым олэв, каснэ вәрмаль суссўв, мāнавн тыт сака мўстыс. Пāвылт олнэ мāхум пуссын кās вārёгыт, мүй хотпат нупыл сьмыңыщ сунсэгыт. Тамле ялпың хотал щёпитан хотпатн пўмащипа лāтың лāвёв. Мән тыг тэлы лёңх хосыт машинал ёхтысўв.

Тыт Андрей Филиппов рўтув колэт мүйлэв.

Евгений Понисаев пыгён элалы потыртас:

– Ам щар овыл щёс тыг ёхтысум, тыт ёмас ос пўмыщ. Пёрщин ёнгилыт ань кассум, нōх-патсум ос мүйлупсал майвёсум. Мән тыгыл Нёрн ялуңкве ос таңхёв, омагум-āтягум тыгыл 40 вёрыста палытан тотыглавёсыг. Туи порат ос номсэв тув минуңкве, туп тыгле-тувле яласанлёңхын сакатārвит.

Мот мүй хотпат Пермь ўсныл ёхталасыт. **Татьяна Сасунова** таи лāвыс:

– Мён ойкамёнтыл китынтыг тыг ёхтысмён. Тамле касыл урыл мән ищхйпың ут хосыт ляххал ловиньтэв ос тыг минуңкве та щёпитахтэв. Тыг йинэ тārвит лёңхыл ат пилэв, тыт пўмыщ ялпың хотал вāрыглаве. Сосса мāхум сака ёмасыт, тахольт тāнки пёс йис наканыл элалы тотыяныл.

Игорь Сасунов ойкатэ элалы потыртас:

– Ам ань тыт олнэ сосса мāхум щāнь лātңыл эргын эрганыл хўнтлысанум, такем ёмасыг, нётнэг суйтэгыт. Тувыл вāглум, мāньлат хотпат щāнь лātңыл потыртаңкве ат хāsэгыт. Тāн такем ёмас вārмаль вос вārёгыт, пёс наканыл ул вос ёрувляныл, ос щāнь лātңаныл элалы вос тотыяныл.

Лариса Шевченко, юртнэтэн овыл щёс Саранпавылт мүйлыс, тав лāвыс:

– Такем пўмыщ ялпың хотал олыс, тыт ущлахтын тэлат ёмщакв щёпитавёсыт, таимāгыс пўмащипа лāвёгум. Ту-

выл яныг пўмащипа лāтың сāлың мāхумн лāвёгум, тāн нёмсат кос ос такем тākсарыт, пёс накыт вāганыл. Янгыщ нэ хотпатыл ам оцатахтасум. Тāн āнумн сака мўстысыт.

Аквта порат акв мāньлат сāлың хум **Дмитрий Солянов** потыртас:

– Ам 2013 талт сāлы ўрнэ мән рўпитаңкве патхатсум. Тот ёмас, тамле олупса āнумн ты эри. Ты элы-пāлт омагум-āтягум сāлыңколт яласасыг, рўпитасыг. Ань пенциян патхатсыг, тувыл Саранпавылн вāнтлысыг.

Мән хотыт пиркатат рўпитэв. Хўрум щёмьяң мāхум тот олэв, Соляновыт коньпал Наталья Хозяинова ос Вокуев колтāглыг. Акв мāнь нйв-рамакве ёт тотыглым оньщёв, яныгнув āгирищит-пыгрищит пāвылн ханищтахтуңкве кётыглавет.

Пиркāта щирыл мән ат сōтыра сāvит сāлы ўриянўв. Олн мāнки сэлэв, матыр ёвтнэ порат ищхйпың ут хосыт лāтың кётэв. Мāнавн сāv хунь эри. Тэнутыл ос эрнэ пормасыл таквсы ёмт вертолётыл тотыглавёв, та сьс нйврамыт тув талттавет ос школан та кётыянўв. Туи ювле тотавет, тāн ос матыр выгыт. Вездеход яланты, уральтавёв ос матарыл тотавёв.

Ань ялпың хоталув сьс пāвылт лāпкан щалтсэв, матыр ёвтэв. Яныг таквс этпос ащирма хоталыт сьс сāv сāлыт нёвлиг вāрианўв, тонт 700 сāvит сāлыт нёвлиг тыналыянўв.

Ань мүйлын хотпат посың номтыл ювле минаят, ос сāлы ўрнэ мāхманув сāлыңкола-нылн ювле вāнтлысыт.

Тамара МЕРОВА



Лариса Шевченко, Татьяна ос Игорь Сасуновыг



Снежинск ос Тобольск ўсныл ёхталам мүй хотпат

Салыл каснэ мән сав мир атхатыглас



Хумыт салыл пуссын аквторыг сүлттэгыт

Хальүс район Саранпавылн махум сав маныл атхатыгласыт. Тот рётың юсвой этпос 25 хөталэт салың махманув магыс касыл вэрыглавес.

Салы үрнэ хум хөтпат халанылт маттем та кассыт – салың сунын үнтыт, тувыл сунанылт люлим яласасыт, ётыл ос товтыл масхатасыт, салыянылн люлим тотвёсыт. Нэ хөтпат ос кассыт. Мир халт маньщи махманув олсыт, тән ётаныл потрамасум, китыглахтасум, хотыл блэгыт.

Саранпавыл нэ **Анастасия Ардальоновна**

Качанова рүт хөтпанэ ёт ёхталас, тав лавыс:

– *Матьёмас тамле ялпыңхөтал вэрыглаве. Маньлат хөтпанув, няврамыт сунсэгыт, ань маньщи мирув пёс тагыл тох ты блэгыт, яласэгыт, салыяныл ёт вэнтлэгыт.*

Ам ащойкагум-анёквагум – Николай Иванович Тихонов ос Ульяна Гавриловна, такви бпаричнаме

Хозумова, сав тал нёрт салыянэн ёт яласасыг.

Нявраманэн пуссын нёрт самын патсыт, яныгмасыт – Елена, Матвей, Татьяна, Степан, Алексей ос Анна. Тэн юипалэнт туп Степан пастухыг олыс. Тав хунь армияныл ёхтыс, тара нёрн минас, пенсиян патнэтэ мус тот та рүпитас.

Атям Ардальон Спиридонович Качанов ос омам Татьяна Николаевна ос ёрнколың мят рүпитаңке патхатыгласыг, атям зоотехникыг олыс. Тав атимыг ёмтме юипалт,

омам та рүпитан маныл та пойтыс.

Мән ань салың махум нупыл сунсэв, хумус яласэгыт, халанылт касэгыт. Тананыл касалэгу, номтум татем ёмас.

Вэглүв, тән вэрнэ рүпатаныл сака тэрвигыт, касың хөтал салыл яласэгыт, үргалыяныл. Таимэгыс ты тән сака таксар махум, кос хум, кос нэ хөтпат, молях, пёлыш минэгыт. Касманыл порат төва мят түйт халн тэлыглэлэгыт, сома товлыңхап тыламлы – та яныт вэгыл та нуйхатэгыт салың суныл. Сунсуңкве сака пумыш.

Тамле ялпыңхөтал олыглан порат мән акваг ёхталэв, тыт мощ мүйлэв. Маньщи супанув, тораңув осн-выганүв, масыянүв. Салыт ляпат татем щэгтым ёмыгтэв, рүт махманув касалыянүв, паша-лахтэв, манти латнувтыл потрамёв. Ты хосыт пёс йис олупсав элаль олы, щань латнув суйты.

Маньщи мирувн, салы үрнэ махманувн сав ёмас латың кетэв, пус кат, пус лэгыл вос блэгыт, яласэгыт.

Светлана РОМБАНДЕЕВА



Ты хурит Кирилл Сайнахов, Ардальон Качанов, Ксения Калмогорова, Анастасия Качанова, Славик пыге ос Валентина Юрьева пёслым блэгыт



Маньщи пыгыт люляхөлэгыт: Леонид Албин, Ромбандеев ягыгыг Сергей ос Яков, Лев Кугин

Молты тал сав вөр найн ёсвес

Хальүс район янытыл 2022 талт туй сыс сав вөр улян тайвес. Тонт най харыгтаңке махум савсыр маныл тув кётыглавёсыт. Манрыг тасавит вөр акторыг найн тот ёсвес, манхурип рупата ань вөр ўргалан хөтпат воруңке тот патэгыт ос сав мөт вәрмалит урыл мән Хальүст өлнэ лесхоз кўщай ваңын нэ Елена Бухарина китыгласлүв.

– Елена Витальевна, лесхозт рупитан хөтпат манхурип рупата ань вәрёгыт?

– Мән Хальүс районт яныгман вөрүв ўргалы-лүв, пөх хөтпат тыт ййвыт ул вос сәгрысыт, вөр ёл-яктын мят пуссын ёма-щакв сунсыглыанүв, най-тёмыт хот-сыстамтыанүв.

Саккон щирыл тыт яныгман ййвыт колыт, пәртколыт ўнттын, пўса-сыт вәрнэ, кўр палтыглан мэгсыл мән махум тына-лаңке вөрмиянүв. Вөр аренда щирыл тән нупы-ланыл хансылүв. Пил вә-туңке, ләхыс атуңке тән тот өс вөрмёгыт.

Организацият та ма танки нупыланыл ке хан-сыяныл ос ййвыт тот хот-сәгрыяныл ке, мәнй ййвыт ўнттуңке ләвия-нүв. Ты рупата мўсхалыг вос вәрияныл, өс ёма-щакв уральтиянүв.

Ам 1993 тал пәсныл вөр ўргалан хөтпаг рупитэгум. Та порат мән вөрт яласасүв ос тот яныгман ййвыт уральта-санүв, ань тай савсыр нэпакыт хансым шар ат аств. Таи ёмас, ань иш-хйпың утыт эрнэ карта өньщөв, ўргалан мав тара ёмащакв сунсыг-лылүв. Пөх хөтпат вөр сәгруңке ке патэгыт, мән тара кәсалиянүв.



Е.В. Бухарина

Тамле ишхйпың ут өньщөв кос, лесникиг рупитан хумыт вөрн өс ялантәлэгыт. Ёл-сартым ййвыт ке хөнтэгыт, ты вәрмалы тара хуригн пөслэгыт, эрнэ нэпак хансэгыт, тувыл Природ-надзор-колн кётияныл. Тән ос ты вәрмалы хосыт элалы рупитаңке өвыл-тахтэгыт. Тамле лүль вәрнэ хөтпат ке пувавет, сутывавет ос яныг штраф-олныл хансавет.

– Нән вөр ўргалым рупитэгың, мансавит ййв тал сыс ўнттэгың?

– Мән шар мак яныг рупатав – тыт өлнэ вөр ўргалылүв. Мәнй ййвыт ма-вит ўргалан хөталыт янытлан кастыл ўнттөв ос павлың мир тув вөвыглыанүв. Тамле рупата таквсы ос тўяг вәрыглөв.

Сўкыр этпост «Ульпа хөтал» ялпың хөтал щөпитәлөв, тонт ўльпат Хальүс ляпат няврамыт ос хөт-әти рупитан махум ёт ўнттөв. Яңк нәтнэ этпос «Весенний день древо-насаждений» нампә хө-тал кастыл махум акван-атыглыанүв.

Тыт өлнэ мир ма-витув вос ўргалэгыт, вөрт порс ул вос пәхвтэгыт, уля нөх ул вос пёламтэгыт, ййвыт наскәссыг ул вос сагрёгыт, та урыл тәна-нылн потыртөв.

Школат ханищтахтын няврамыт ёт өс акваг хөнтхатыглөв. Мән район-ув Кульпас павылт «Лүй вөт» ос Хальүст «Вөр» кит школьный лестни-честваг рупитэг. Агири-щитн-пыгрищитн өлнэ мав ўргалаңке, аращ хумус пёламтаңке ос



Няврамыт ййвыт ўнтэгыт



Вөр үргалан хөтпат



Павлың мир ййвыт үнттысыт

ётыл ёмашакв лап-харыгтаңкве, ййвыт үнттуңкве ханищтыянув.

Тан катыл савсыр пормасыт мащтырлэгыт, мавитув хуритн пөслэгыт, тувыл касылн кетыяныл. Округувт олнэ школьный лесничестват халт касым ос бвыл места ватихал вуйлэгыт.

– Мансавит хөтпа Хальүс лесхозт ань рүпиты?

– Мән ат элумхөлас тыт рүпитэв. Хальүс район лесхоз 6 млн 296 сөтыра 251 гектар янытаг олы, тыгыл яныгнув туп Нижневартковский районт олнэ лесхоз. Сергей Васильевич Пьянков тыт пунктоты, ам кұщай ванын хөтпа ос хұрум хум вөр үргалым рүпитэгыт.

Мән хұрум участок бныщёв, Хальүст – Андрей Анатольевич Алексеев, Саранпавылт – Николай Дмитриевич Попов ос Кульпас павылт Яков Михайлович Героев вөр үргалан хөтпаг олэгыт.

Кульпас павылт Марий Эл маныл ёхтум хум кит тал рүпиты. Тав 2 млн 546 сөтыра 152 гектар яныт ма уральтытэ, рүпата акваг сав бныщи. Хальүс районт кит лесхозыг олэг - «Берёзовский» ос «Няксимвольский». Нящамвөль павыл вөре Советский район нупыл

хасвес. Ты лесхоз кұщяе Агириш павылт олы.

– Елена Витальевна, соссa мэхум ётрүпитэгыт?

– Мәнщи, ханты ос ёрн мэхум ёт мән бс рүпитэв. Саккон щирыл тан ма-лөмтыл олн ойтнэ тал мыганув. Ййвыт улюв магсыл сартуңкве, норыт кол үнттын магсыл яктуңкве тот вөрмёгыт.

Тан нам-нэпаканыл ёт мән палтув ёхталэгыт ос тытзаявление-нэпак хансэгыт. Мән касың тал 300 арыгкем договор хансэв, ты халт савнув соссa мэхум магсыл тамле нэпакыт щёпитэв.

– 2022 талт туи Хальүс районт мансавит вөр найн ёсвес?

– Мөлты тал туи бйттур

этпос ос вөртур этпос ссы шахлыт акваг кургысыт, вөт такыщ вөтыс ос щар ат раквыс, ма тосамыг ёмтыс, тонт арген сав мятт найн аквторыг нөхпеламлас.

Вөртур этпост Хальүс район янытыл акваг порат 88 мятт найн тэс, та порат сака сав вөр улян хотталы тотвес. Такем посымыңыг ёмталас, төва порат лылтүңкве сака тәрвитуң олыс.

Тасавит найн тара лапхарыгтаңкве мәнки ат вөрмысүв, нётмил вөвсүв, Тюменский, Свердловский, Иркутский областитныл, Красноярский крайныл ос Алтай маныл пожарникыт нётуңкве тыг ёхталасыт.

Тонт 500 арыгкем

элумхөлас Хальүс район янытыл рүпитасыт. Москва үсныл «Би-200» яныг товлыңхәп ёхталас, найн лап-харыгтаңкве сака ёмашакв нётыс.

– Найн ёсым мятт манхурип рүпата вәруңкве ань патэгыт, мән ййвыт тот үнттэгыт?

– Ты тал лесопатолог-хөтпа Нягань үсныл тыг тах вөвилүв. Тав найнтэмыт ёмашакв ханищтаңкве тах патыянэ ос элаль маныр вәруңкве эри, манава тах лави.

Хальүс районт сака сав вөр найн ёсвес, тот мән ййвыт үнттуңкве ёрув ат төвылхаты ос сака сав олн эрмыгыл. Найн ёсым мят ийльпи ййвыт 8-10 тал ссы танки тах яныгмёгыт. Мән уральтаңкве туп патыянув, манхурип ййвыт тот яныгмёгыт. Ос сунсэв, найн таим ма пөхыт яныгман ййвыт агмыл ул вос ёмтыс. Агмыл ке ёмтэгыт, тонт ёл-сәгрയാнув.

Мән районувт 71% савит мят ййвыт яныгмёгыт. Тот щар сав тарыг ййв яныгми, ты ййвыт 44 % савитыг олы, ұльпа тыт мощца – туп 14,5% савит.



Вөр үргалан вәрмаль урыл потырты

Людмила ТЕТКИНА
Е.В. Бухарина кетум хурит

Пәвлумн ялантаңкве сака Эруптәгум

Хальүс районт сака нётнэ пәвыл Өлы – ты Кимкъясүй пәвыл, тот Өлнэ мähманув мähнщи лätңыл ёмщакв потыртэгыт, тән сосса мир пёс йис Өлупса вәгыт ос мähн нйвраманыл ханищтэгыт. Хум хөтпат вöраяңкве ос хул алыщлаңкве ялантэгыт.

Пәвыл сака нётнэ, туи порат сәв хорамың ййвыт ос лүптат яныгмөгыт, нйврамыт щәняныл-әщаныл палт аквписыг ёхта-лэгыт. Наталья Васильевна Попова ёт мён хөнтхатыгләлсумён, тав колтәглэ ос пәвлэ урыл тох потыртас:

– Кимкъясүй пәвлув школа ат Өнъшас, мäh мähн порат Кульпас пәвылн ханищтахтуңкве кётыг-лавесүв, тот интернатт Өлсүв. Школат ёмщакв ханищтахтасүв, элаль мäh мähн мähгсылув сәвсыр ханищтапыт Өлсыт, юнтсүв, пальсак, турлөпс, хорамың хансаң олнкас сакыл хартсүв ос ййквуңкве



ханищтахтасүв. Лүймә мähманув ййквыт ос йильпи щирыл ййквсанув. Ханищтан нэв ёт Югорск үсн ййквим ялсүв, Кульпас пәвыл яныт-лан хөталт аквписыг ййквсүв.

Школа әстламум порат ам Ханты-Мансийск үсн ёхтысум, Нижневартовский государственный университетт ханищтахтуңкве Өвылтахтасум, тот ам щән лätңыл ос сосса мир литература специальностюм Өлыс, элаль Югорский государственный университетт ханищтахтасүм ос 2004



Н.В. Попова әгияге ёт

тәлт әстласлум, диплом нэпакумт «Филология» хансым Өлы. Тыт Өлуңкве хулытсум.

Вөртур этпос 2004 тәлт Екатерина әгим самын патыс, кит тәл мус ам тав ётэ юн үнлысум. Нйврамум кит тәлэ төвлыс, омамн тав Кимкъясүй пәвылн тотвес, тот нйврамыт үрнэ колн ялантаңкве патыс. Ам Югорский государственный университетт рүпитаңкве Өвылтахтасүм, 15 тәл сыс тот ты рүпитәгум.

– Колтәглын урыл потыртән, маныр тән вәрөгыт?

– Әшум Василий Валентинович Лыткин, тав сака кәркам хум хөтпа, юн сәв рүпата вәри, тав нәйив сәгри, хул алыщлы ос вöраяңкве яланты.

Омам наме Лидия Александровна Лыткина, тав ФАПыт санитаркаг рүпитанэтэ 34 тәлыг ёмтыс. Туи порат пил вәты ос ләхыс аты, тәпкант картөпка үнтты, помидорыт, моркопка ос капуста янмалты.

Ащөйкам Александр Иванович Монин пёс йис Өлупса урыл сәв вәг, нётнэ турсуил мähнщи ос рущ эргыт аквписыг эрги.

Яныг әгим Катям мähн порат ёсал хәйтыс ос писалил пәтлуптас, таве ханищтан хум акв щёс ләвыс: «Нән щёмьянт вöраян хөтпат Өлсыт? Пёсын ёмас пәтамтэгын». Янгыгнув ёмтыс, ёсал хәйтуңкве элаль ат патыс.

Школат ханищтахтаме порат пусмалтан урыл сәв нэпак ловиньтас, ос экзаменытн щёпитахтуңкве патыс. Тав ань Өвыл курсыт Ханты-Мансийский медицинский академият лёккарыг ханищтахты, аквписыг нэпак ловиньты ос сәвсыр видео пусмалтан вәрмаль урыл сунсы.

Мähн нйврамум Вероника наме, хунь хурум тәлэ төвлыс, тав ййквуңкве патыс. Кәсың тәл сәвсыр суссылтап Өлыглы, сәв диплом нэпакыл ос мүйлупсал миве. «Хәлькве» нампа нйврамыт үрнэ колт тав Юван Шесталов хансым стих ловиньтас ос нөх-патыс.

Мән ты ёмас ос кәркам мähнщи нэквен ёмас лätың кётэв, Өлнэ нотэ я хольт вос ови, миннэ лёңхе посың вос Өлы. Сөтыңыщ Өлән! Пус кәт, пус ләгыл!

Оксана АЛБИНА
Н.В. Попова мим хуриянэ



Лидия ос Василий Лыткиныг

Салы үрнэ мат щань латнув суйты

Пёс тагыл сасса мирыт колтагланылт сав няврам яныгми, мörсын порат акв-кит няврам самын паты. Мәхманув салы үрим яласэгыт, вбраёгыт, хул алыщлэгыт. Нявраманыл мәнътәгыл сунсэгыт, ома-әтяныл хумус рүпитэгыт, матыр-әти щаквщэгыт ос мәщтырлэгыт. Хунь мощ яныгмёгыт, нётуңкве патэгыт, ханищтахтэгыт.



Мирхал конгрессын атхатыглам мәхум, 2022 тәл, Ханты-Мансийск үс

Ханты хум Алексей Анатольевич Лонгортов омаге-әтяге салы үрим яласасыг, сав няврам янмалтасыг. Алексей Ямал мат Салехард үст олы, мощаг хультум сасса мәхум департамент колт мирн нётнэ ос правовой тэла палт пуңктоты. Ханты-Мансийск үсн ёх-таламе порат, тав ётэ потрамасум, рүпататэ урыл китыгласлум. Алексей тох лавыс:

– Ам мәнътәгыл щаня-гум-әщагум ос ягыг-анум-ягәгянум ёт тунрат салыңколт олсум, тот яныгмасум. Рүтанув ос пуссын салыяныл ёт яласэгыт, тәва мәхманув

тәнти салыт оньщэгыт, тәват ос сельский хозяйство предприятие мат рүпитэгыт.

– Ямал мат салы үрнэ тэла хумус мины, матыр тәрвит олы?

– Салың мәхманув ань сәккон щырыл рүпитэгыт, тән мәгсыланыл эрнэ нэпакыт хансэв. Миркол пәлыл ань ос сака нёта-вет – түйт тармыл яласан машинатыл, нәйив сартнэ тәрыл, нәйпос вәрнэ утыл, парщиныл, та мәныр, пуссын ёвтавет, майлавет.

Салы үрнэ мәхум мәгыс олыглан мирхал хөнт-хатыглапытн мән акваг ялантәлэв. Мөлтү порат

Ханты-Мансийск үст атхатыгласүв. Тамле мат мәхум йильпи сәкконьт щёпитэгыт, хансэгыт. Мән, сав мәныл акван-атхатыгләлнэ мәхум, потрыт хунтлэв, кәсың нэпак ёмащакв ловиньтылүв, ханищтылүв, тувыл кәтпос пинэв, кәсащэв ман әти. Мәхум савыңпәлэ кәсащэгыт те, потрыт сәкконьт вәрнэ мәгыс щёпитаңкве та патавет. Тувыл хунь сәккон-нэпак кәтын-паттылүв, йильпииг ловиньтылүв, элаль та эрнэ потрыт щырыл та рүпитэв, мәхманувн нётэв.

– Ямал мат мәнълат хөтпат салы үрнэ тэла палт рүпитаңкве кәсащэгыт?

– Мән мәвт кәсың щёмьят сав няврам яныгми. Салың мәхум няврамың тагыл салыяныл ёт вәнтлэгыт, тох та рүпитэгыт. Хунь школан миннэ пора ёхты, әгирищит ос пыгрищит интернатт олэгыт. Колтаглыт хөт-сәт няврам самын паты те, кит-хүрум хөтпа ётыл тах салы үруңкве атхунь хультэгыт. Щань-әщаныл вәрнэ тэла хумус хулияныл, овлэт нас нётэгыт, тувыл тәнти щёмьяңыг ёмтэгыт, элаль акваг рүпитаңкве та патэгыт.

Ань Россия янытыл салы үрнэ тэла сака янытлаве. Сав ёмас, номтың мәхум ос мирколт рүпитан кущаит эрнэ нэпакыт хансэгыт, салың мир тармыл патавет, сыре-сыр нётмилытыл щёпитавет, вәнтлын мәнанылт олнэ колытыл үнттавет. Тән туп рүпитаңкве вос тахнувыт, мәнълат әги-пыганыл салы үруңкве вос ханищтануваныл. Сосса мир мәгыс ты мак эрнэ тэла.

Салы – ты мән олупсав, тав ляпатэт щань латнув суйты, олнэ кол, маснут, тәнүт, та маныр, пуссын оньщэв. Салы ёрыл мән ты олэв.

Светлана
РОМБАНДЕЕВА



А.А. Лонгортов



Тав а́кве Анна Конькова ۆлыс

Юи-өвил тәлытт сәв хөтпа стихыт ман потыр-охсат хансуңкв патсыт. Тән ты тәлан ат кос ханищтавёсыт, ос хансум утаныл сәвсыр журналытт ос нәпакытт хансыглавет.

Акв тамле нә наме Светлана Владимировна Карнаухова, таквинәтә мәнъщи хөтпаг ләвитә, вильтә руц хурипа кос. Өлупсатә урыл мәнъщи газетав мәгсыл потыртас, ты урыл ань элалъ ловиньтән.

– Ам 1951 тәл сүкыр э́тпос 16 хөталәт самын патсум, ты тәл нелсәт нупыл титыт тәлум тах төвлы. Омам щирыл пёс порат өлум мәнъщи рүтанув Кентиныйт пуссын Хөнтаң районт өлсыт.

Пәвланыл Евра пәвлыг ләввес. Яныг хөнт элыпәлт ты яныг пәвилт налымантем кол үнлыс, кәсың колт сәв няврамың колтәгыл өлыс. Кентиныйт коланыл акв ляпат үнлысыт.

Хөнтлан вәрмалъ өвил-тахтаме порат пәвилт хум хөтпат пуссын тув тотвёсыт. Ам ащдйкам Алексей Федорович Кентин өс

тув ми́нас. Омам тав урөтыл тох потыртәлыс, Ленинград үс вуянтым хөнтлыс. Тувыл хөпсы агмыл өмтыс, юв төтвес. Тав тит хөтпагн юв тотвес, такви йиңкв ат вёрмыс, татем агмың өлыс. Юн тав пусмалтахтас. Э́кватә руц нә өлыс, тән 11 няврам өщсыг, төват мән-тәгыл сәвсыр агмытхосыт а́тими́г өмтсыт. Туп нила агияныл яныгмасыт.

Акв агияныл – ты ам омам. Тав школа а́стламе юи-пәлт педучилищан ханищтахтуңкв өхтыс, тыт хум вәрыс, мән хурум няврам самын патсүв – ам ос тит ягпыгагум Станислав ос Василий. А́тяв илттыг а́тими́г өмтыс, омам өтыл мөт хум вәрыс.

Намың-суиң а́кве урыл

Ам нелолов класс а́стла-лум юи-пәлт Ханты-



С.В. Карнаухова

Мансийскат педучилищат ханищтахтуңкв патсум. Мән группавт сәв а́ги өлыс, Еремей Данилович Айпин өс мән өтув ханищтахтас. Мән таве сака э́руптаслүв, ос тав татем э́ссамтас.

Төнт омам сака олныл хунь нөтыс. Тәңкв тахмаөгум, а́квум палт та минэ́гум. А́квум Анна Митрофановна Конькова өлыс, тав мән ляпа рүтув. Номилум, өлум колә мәнърищ өлыс. Тав палтә өхтэ́гум, өмащакв тыт-тавем. Төванакт юрtäги-яну́м өт выганум, пуссын пасан вәтан үнттавөв.

Анна Митрофановна «Беломор» на́мпа хохса хартыс, акваг та потыгтас. Тав сака өмас сымың хөтпа өлыс, а́нумн такви урөтыл акваг потыртәлыс, хумус рүпитаңкв өвил-тахтас, хөт рүпитас.

Төва порат ам өтум мәнъщи ләтңыл потыртас, мәнъщи ләтңыл потыртаңкв а́нумн ханищтастә. Ос мәнавн төнт тувле нупыл ман тәла өлы? Төнт ам 16-17 тәл яныт өлсум, щар ат пүмщалахтасум.

Педучилище ам ат а́стлыслум, ху́рмит курс юи-пәлт каникулн Урайн ми́насум, тот акв пыг өт вайхатсумён, э́лалъ ханищтахтуңкв ат патсум, хум вәрсум. Тит няврамагмён самын патсыг – а́гим ос пыгум. Тувыл рүпитаңкв та өвилтахтасум.

Стихыт хаснә вәрмалә

Светлана Владимировна потыртас, тав сака аты номитә, хунь өвил стихыт хансуңкв патыс. Рүпатат таве ма́хум акваг вөвсаныл, тав стих хотты хөтпа мәгыс вос хансы. Тувыл таквирот матыр потыр-охса манос стих нәпакн та хансыгыты.



Акван-атхатыглан Э́кват



Л.А. Новикова (Кентина)



С.В. Карнаухова

1980-ыт тәлыт порат Урай үст өлнә поэтыт ос писателит акван-атыглаңкв патвёсыт. Нә өс тув вөввес. Акван-хөнтхатыгланэныл порат тән танти стиханыл мөт мэхум элы-пәлт ловинь-тасаныл. Халанылт ханищтахтасыт, потыртасыт – хумус ёмашаквнун хансуңкв эри.

Та пәсныл тав стиханэ, вәти потыр-охсанэ сәвсыр журналытт, газетатт хансыглавёсыт. Ты йист өс хансыглавет. Нә ләвыс:

– Төванакт вөвавем, амти хансум утанум журналытн вос тетыяnum. Акв-тит щёс тетыгласанум, ос тән ам хансум ләтнанум мөт щирыл хансыяныл. Ты тәла аномн щар ат мұсты. Такос ләвияnum, ам щирумтыл вос хулытэгыт, ати, танти хумус таңхёгыт, та щирыл мори та хансыяныл.

Сосса хөтпат акван-атхатыглан кол

Урай үстмәньщи, ханты хөтпат өс өлэгыт. Хотты тәлт тән «Возрождение» нампа кол пуссыт. 2018 тәлныл ты колт күщаиг Светлана Владимировна өлы. Ущлахтын хөталыт порат акван-атхатыглэ-гыт, мәньщи супыт юнтуңкв, мәньщи йиквыт йиквуңкв ханщтахтэгыт. Ты урыл тав тох потыртас:

– Мән, та ёрт өлнә сосса хөтпат, пёс накыт, йиквыт сака хунь вәганүв. Мәнав Нина Демьяновна Тихонова ханищтыянэ. Тав ты хулты, мәньщи супыт хумус йинавет, хумус юнтавет, йиквуңкв мәнав өс ханищтыянэ. Ань та колн вәтахтем нэквет ос экват акваг ёхталэгыт.

Ялпың хөталыт өлнә порат мән йикванув мирн

суссылтыянүв, эргёв. Пуссын мәньщи супыл масхатым өлэв. Йикванувт мәньщи өлупса суссылтэв – нэквет хумус вөрүй совтынтлэгыт, матыр пормас хумус юнтэгыт, пил хумус вәтэгыт ос мөт сәвсыр вәрмалит.

Ам тув 2006 тәл пәсныл ялантэгум. Та тәлт бйкам атимыг ёмтыс, сымумт сака тәрвityң өлыс. Матьёмас «Возрождение» колн вөввёсум, тән аномн сака ёмашакв нётсыт, акваг ёмас ләтңыл потыртавёсум. Тащирыл та элаль өлнә ёр хөнтсум. Ань тән ётаныл сәвсыр ялпың хөталыт вәрыглэв, ам тот амти хансум стиханум ловиньтыяnum.

Няврамагум урыл

Агиягум-пыгагум хосат янас өлэг. Агим хұрум няврам өньщи, Соня яныг

агитэ Санкт-Петербург үст өлы, Петя котиль пыге университетт ханищтахты, Амадей мәнь пыге школан иң яланты. Няврамаквет пуссын сәрьёрыг яныгмасыт, ханищтахтуңкв сака кәсашёгыт.

Дмитрий пыгум Санкт-Петербург үст А.И. Герцен нампа университетт ханищтахтас, аслас. Тувыл Салехард үсн рүпитаңкв минас, тувыл юв ёхтыс, Урай үст культура тәла щирыл мөч рүпитас, пөхан минас.

Ёмашакв өлуңкв ат кәсашци, вина айнэ нупыл өлы, нэ өньщис, титтыгминасбг. Сәв тәл тактёт өлы. Аномныл нётмил вөви, сака ат нётылум, такви хумус таңхи, тох вос өлы.

Ань хөнтлын сәлтатанувн нётэв

– Ты колувн ялантан төва экват апганыл өс хөнтлын мән тотвёсыт. Мән ань ос тән магсыланыл носкит, тит тулөвлың пәссат сагёв. Тэнут атэв. Матыр вәруңкве эри те, ләвавёв, тәра та вуйхатэв. Ятил нявраманув пуссын пүстәгыл юв вос ёхтэгыт. Мәнавн, яныгпәла хөтпатн, воссыг нэматыр ат эри.

Тамле ты сымың нэквег Светлана Владимировна Карнаухова өлы. Потре магыс пүмашипа ләтың ләвёгум, элаль пүстәгыл вос өлы, нэматыр агм тав палтэ ул вос ханы.

Валентина ВАСИЛЬЕВА

С.В. Карнаухова тётум хурит

<p>Лүймә сәрипос (Северная заря) № 6 (1288), 23.03.2023 Соучредители Дума, Правительство ХМАО – Югры Издатель Департамент общественных, внешних связей и молодежной политики ХМАО – Югры</p>	<p>Редакция Директор, гл. редактор – Динисламова С.С. Телефон (3467) 33-36-82 Заместитель директора – Кондина Г.Р. Телефон (3467) 33-22-72 Ответственный секретарь – Узель В.В. Телефон (3467) 33-23-09</p>	<p>Адрес редакции и издателя: 628011, г.Ханты-Мансийск, ул.Комсомольская, 31 тел./факс (3467) 33-17-52 Е-mail: gazeta@khanty-yasang.ru Газета размещена на сайте www.khanty-yasang.ru Отпечатано: ООО «Новости Югры- Производство» г. Сургут, ул. Маяковского, д. 14.</p>	<p>Индексы 04399, 54399 Тираж 1710 экз. Заказ 1154 Цена свободная Мнение авторов публикаций не обязательно отражает точку зрения редакции. Газета зарегистрирована Управлением Федеральной</p>	<p>службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО. Свидетельство о регистрации ПИ №ТУ 72-00795 от 23 января 2013 г.</p>
--	---	--	---	---

Сәв потыр Өщнә Эква



Рахтымов урыл

Ам 27 тәлум Өлыс, хунь хум вәрсум. Тав ханты хум Өлыс. Мән тав Өтә Кульпас пәвылт аквөт хаништахтасмән, та пәсныл таве вәслум. Акв щәс Сүкырья пәвылт ййквнә колн ми́на́сум, тох тай тув ат ялантәгум, ос тонт ми́на́сум. Та порат Нёрныл аквмат руц пыгрищ Өхтыс, наме Лёня. Тав ләви: «Ам Свердловск үсныл Өлзгум, ань тув минзгум, тыт нә тотуңкве таңхөгум». А́нумн Өт вөвитә, ләви: «Ам вөй тотап Өньщөгум». Ам мовиньтәгум: «Ам вөй тотап магыс ат тыналахтәгум!» Тох потрамим Ө́ми́мән, мән юи-пәлмән Рахтымов Ө́ми. Руц пыгрищ а́нум титыглы: «Мән юи-пәлмән хотьют юв?» Ам ләвөгум: «Рүтум». Тувыл юил Рахтымов саран ләтңыл а́нум титыглытә: «Ты хотьют?» Ам ләвөгум: «Ты Лёня, тав вөй тотап Өньщи, а́нум үсн вөвитә...»

Ты вәрмаль 1964 тәл порат Өлыс. Хунь Лёня ми́на́с, Рахтымов ләви: «Мән тунранупылтөтавөв, Карский щәршин. Ты тәл тув ялзгум, мөт тәл Өхтәгум, акван-минимән».

Мөтыт тәл Ө́мтыс. Ам

Минам тәлт Евдокия Илларионовна Тальмич (Рахтымова) урыл ма́н ма́нь потыр хансыгләлсүв. Тыхотал ятил ма́ньщи Эква потранә Элалъ ловиньтән. Таве хунтлаңкве сака пүмыщ, маныр урыл потырти, ты урыл аквтоп тина сунсэгын, тох нөтнэг потранә минзгыт.

а́гиришит Өт Хаңла пәвылт мисыт посым рүпитзгум. Таквсы порат рүпатам юи-пәлт үщлахтын хоталыл майвөсум, а́гиришит титыглыанум: «Хотьют ам Ө́тум юв Сүкырья пәвылн ми́ны?» А́гиришит ат кәсашасыт, миннә лөңх 11 вөрыста, тәнанылн а́лпыл мисыт посуңкве эри. Ам амттем та ми́на́сум. Кон ащирма. Яңкылман нзглысум, сунсэгум, лялът сәлың сунсүлтты. Лөңхныл пөхын унтхатсум. Пыг суве вущкаса́стә, тох сәлыт торгамтзгыт, Ө́л-люлюңкв эри. Пыг, насати, Коля Рахтымов, титыглахты: «Хоталь минзгыт?» Мән тав Ө́тә ювле а́гиришит пәлт ми́на́смән, тот тән касырлаңкве патсыт. Ам ләщал кон-квәлсум, юв та минмыгтасум, сымум тай нас порги... Мощ ми́на́сум, тувыл юил сәлың суныл Өхтүвөсум. Тәлсум. 9 январьт акван та хасхатсумән.

Сәлыңкол Өлупсам

Өйкам Ө́т акван-ми́на́с-мән. Ванә хөтпанув Ө́т, рутанув Ө́т пүри тзсүв, тувыл нө́рн минмыгтасмән. Лөңхмән хоса Ө́лыс, тит хотал ми́на́смән.

Аквмат ты Ө́хтысамән.

Кон хум хөтпат хохса хартым, потрамим у́нла-хө́лзгыт. Коля тув ми́на́с. Ам тай пормасанум а́л-маясанум, молях Ө́рн-колн щалтапасум, саран ләтңыл пащалахтасум ос титыглахтәгум: «Ам хө́т хуоңкве патзгум?» Яныг Эква, Вале́й На́ста, ләви: «Я-та, ань ма́нъянув пө́ри-наныл Ө́т-тотыглыяныл...» Ам ләвөгум: «Мощө́рт койкам Ө́с тах Ө́т-тоты-лум». Ам сака потрың Ө́л-сум, ошхолиңыг Ө́лсум.

Ты сәлыңколт Сүкырья пәвыл нә Ли́дия Филип-пова щө́мьятә Ө́т Ө́с Ө́лыс, тав мовиньтым у́нлы. Ты Э́лы-пәлт яныг Э́кван тав ләвум: «Ма́н пәлтүв ань депутат нә Ө́луңкве Ө́хты, сака ул лявтән».

Сәлыңколт ам рү́пи-тасум, нила колтәгыл аквө́т Ө́лсүв. Нә хө́тпат а́нум сә́литасаныл, мө́т ма́н минмыгтанэныл порат тән сәлыт тәнти пуви-яныл, тө́рияныл, а́нум нъярамыт Ө́т хультуптыя-ныл, тәнаныл Ө́нгалтыя-нум, тыттыанум. Тән Ө́та-ныл Ө́рнколт пормасыт атзв, минуңкве щө́питах-тзв. Тох пү́мщи́г Ө́лупсам тот Ө́лыс.

Тури́стат урыл

Ты вәрмаль 1970 тәл порат Ө́лыс. Нө́рт Ө́лмум порат акв щө́с юрт а́гим пәлт мө́т сәлың ма́хум Ө́лнә ма́н ялсум. Лөңхе Ө́мас пәлыт Ө́лыс. Тот мощ мүйлысум, ювле минуңкв щө́питахта́мум, Дуся а́нумн ләви: «Ми́н-нән ну́пыл түр Ө́лы, витз, улпыл, хот-тө́сыс. Ам тот ху́лп у́нтталасум, аквө́т ми́нымән, ху́лпум хот-вы́глум». Ми́на́смән, сун-сы́мән, витз щар хот-тө́сам, ху́лыт тө́сам ма́т ты поргө́гыт. Ху́лыт ат-санмән, Дуся а́нумн мис,

таквинә́тән вис, титтыг та ми́на́самән.

Ө́мөгум, ху́л ху́ргум та́рвитың. Сунсэгум, ам лялътум хотьютыт тай та ювыт, хащтәл ма́хум. Лялът хө́нтхатсүв, тән хө́т хө́тпа, акваныл титыглах-ты: «Наң наңктен нө́рыт ат пилзгыт?» Ам ләвөгум: «А́ти, сәлыңколув тот-та Э́лын на́ңки». Тәнаныл Ө́т-вө́всанум, ма́хум щар ва́гтәл патмыт. Колувн Ө́хтысүв, На́ста кантлым а́нум титыглытә: «Наң тәнаныл тыг вө́внә ма́-гыс ялсын?» Ам ләвөгум: «Ма́хум щар ва́гтәл пат-мыт, мощ вос үщлахтә-гыт, тэ́пьялзгыт».

Сө́ль, тән мощ үщлах-тасыт, толтыглахтасыт, ту-выл Э́лалъ та ми́нмыгта-сыт. Тө́нт туи пора Ө́лыс, Э́тыт посу́ңыт Ө́лсыт. Ос та нө́рыт, хоталь тән ми́на́сыт, сака карсыт, щар сома лю́лөгыт. Ма́хум ми́на́м ма́т Э́ти сака түйс. А́лпыл сунсэ́в, ма́хманув ювле ты Ө́хтысыт, щар хот-пө́лимат, нас тө́ргөгыт, маснутаныл хот-ө́сымат. Акв нө́кве а́хвтасың ма́т Ө́л патум, хот-сакватах-там. Ма́н Ө́рнколувт тән исылтахтасыт, үщлахта-сыт, хуясыт, маснутаныл тө́сласаныл, тувыл Э́лалъ ми́на́сыт.

Тө́нт хум хө́тпанув сә́лыяныл Ө́т нө́рт Ө́лсыт, тән тә́ланыл Э́кват, на-сати, хот-рохтыгләлсыт, номсасыт, о́ям ру́щит Ө́хталасыт. Ам тәнанылн лә́всум, ма́хум Э́стония-ныл Ө́лзгыт, тән нө́р пө́с-луңкве Ө́хталасыт, лөң-ханыл хосаг Ө́лыс, тыг Ө́хтын ма́гыс на́иңту́йтыл, то́влыңха́пыл ос ма́шина-тыл йисыт. Тамле вәрмаль ты Ө́лыс.

Светлана САДОМИНА